

Incumbensa da la fracziun da la PS concernent ina iniziativa davart persunas spezialisadas per il Grischun (emprim sutsegnader Degiacomi)

Las finamiras politicas surordinadas ed il program da la Regenza 2021–2024 prevesan betg mo da far pli enconuscent il chantun Grischun sco lieu da recreaziun e sco piazza economica, mabain er sco lieu d'abitar, da scolaziun e da lavur e da commercialisar meglier sia attractivitat economica. Uschia na duai betg mo vegnir prestà ina contribuziun per franar l'emigraziun, mabain er per promover l'immigraziun da famiglias e da persunas spezialisadas. Quest focus è vegnì mess, perquai che bleras bransch han adina dapli difficultads da chattar avunda persunas qualifitgadas en il Grischun.

Sut l'aspect da la pandemia dal coronavirus sa mussa actualmain in'acceleraziun dramatica da la mancanza da persunas spezialisadas en bleras bransch. Spezialmain pertutgada da quai è la gastronomia en il Grischun, ma er en autras bransch è il martgà da lavur sa svidà nunspetgadamain svelt ed en moda radicala. L'index svizzer davart la mancanza da persunas spezialisadas «Fachkräftemangel-Index Schweiz» da l'Universitad da Turitg ha mussà la fin da november 2021, che la situaziun è anc ina giada sa pegiurada marcantamain gist en ils secturs da l'inschigneria, da la tecnica, da l'informatica sco er en il sector da la sanadad, suenter che la situaziun era sa revegnida levamain l'onn 2020. Las mesiras ch'èn previsas en il program da la Regenza na tanschan – sut l'aspect dal svilup actual – insumma betg per franar u schizunt fermar quest trend.

L'iniziativa davart persunas spezialisadas da la Confederaziun, ch'è vegnida lantschada l'onn 2011 per activar il potenzial da las forzas da lavur svizras, mussa che mesiras coordinadas pon avair in bun effect. Tenor il SECO è uschia vegnidas activadas resp. reactivadas supplementarmain passa 148 000 forzas da lavur svizras (en equivalents a temp cumplain) ils onns 2010 fin 2018.

La Regenza vegn incumbensada da preschentar al Cussegl grond ina ferma iniziativa davart persunas spezialisadas per il chantun Grischun. Questa iniziativa duai s'accordar cun la politica federala davart persunas spezialisadas sco er resguardar las stentas correspondentas ch'èn gia en curs en il chantun ed estender quellas cun cleras finamiras.

Cuira, ils 8 da december 2021

Degiacomi, Gartmann-Albin, Wilhelm, Atanes, Baselgia-Brunner, Cahenzli-Philipp, Caviezel (Cuira), Hofmann, Horrer, Müller (Favugn), Noi-Togni, Perl, Preisig, Rettich, Rutishauser, Schwärzel, Pajic, Spadarotto, Tomaschett (Cuira)